

■ COLUMNA

Dapli famiglias dapli scolas dapli ustarias dapli stizuns...

DA SILVIO CAMENISCH

Betg er dal maini ch'ils «noss» duessan, stuessan vegnir davent dabot da la famiglia d'in uffant? Valadas bandunadas, gniesu da spierts, naginas scolas, ustarias, stizuns. La famiglia d'in uffant, die Ein-Kind-Familie, aveva pudì valair per la s. famiglia da Nazaret en Galilea. Oz tanscha in uffant, e sch'i fiss in Jesus, nagliur. Na tanscha gea er betg pli in automobil, ina televisiun, ina abitaziun, in partenari per temp, maindir perpetnada, quai è fact.

Nus savain schon avair vinavant famiglias mo cun in uffant, di in cuss. naz., in dals «noss». Grond intercessur da famiglias grondas, ma gliez avess per consequenza che nossas regiuns sa svidassan talmain ch'i restass anc ina quantiad restanta, e, lain nus quai? «Ein Verbot würde keine Probleme lösen, lediglich neue schaffen.» Per l'amur da Dieu betg. Grazia fitg.

La China ha vis anc baud avunda las consequenzas e revocà ina limita maximala, eine maximale Obergrenze d'in uffant, successur, per famiglia. Quella politica da fitg curta vesida n'ha betg purtà grondamain fritg, n'er betg tar nus: da la regiun e per la regiun. Ils noss e las nossas



n'avessan mai dastgà sa cuntentar cun in, sin pli dus uffants per famiglia. Stà in sbagliun, imperdunabel nunperstgisabel. Il resultat sa mussa per saldo. Fusiuns tut che schula! Adina dapli famiglias da cuntshadira per ch'i dettia in'entira, è gea uschia.

Betg fatg cun auzar ils eglis ad aut e spetgar danunder che vegnia il salit. U rugar, betg per auras, puspè per famiglias grondas. Lètg ventiravlas cun letgs da diesch fin vegn, ventgadus uffants, betg mo raritad. Ins prendeva tants sco quai ch'i deva. Ed i deva ora daried. Ina chasa da duas famiglias ina sur l'austra e ventg, trenta uffants, per saldo ina scola cumplexsiva. Oz fan ins nufs tut a dubel, sa protegia davant e davos, trai si saivs e buna notg Rumantschia.

Ergo, duessan nus far bainvegni a famiglias estras. Ina cultura da la-

schar passar, eine Kultur des Durchwinkens, betg pli nunpussavla. E sajan sincers, bunas famiglias sco «las nossas» datti era estras. En in plum pudessan nus emplenir si vischnancas, vitgs, fracziuns, cumüns in silenzi. Gea, sch'ils noss e las nossas na vulan betg avair in pau uffants, e cun il ferm trend era tar nus: pli gugent cun da medema schlattaina: um um, dunna dunna, neuter neuter, in-summa, dat quai insatge? Dat nagut.

E, tge tegna il «Wutbürger» da quai? Cun il burgais grittentà lain er tschantschar, quel na lain nus en naging cas grittentar. Uniuns culturalas prosperassan puspè, ed i duvrass pir ch'insacur bandierels presidents dirigents salas ustarias maisas radundas. E magari faschessan quels anc gugent mastergns e lavurs ch'«ils noss» na fan betg, pli, e tirassan vi lur famiglias.

Plunas dals «noss» èn ids e van vinavant ora Mustér, giu Cuir e Türitg ed en la Bassa ed en territori da la UE, er là, per chattar meglras plazzas, far carriera, gudagnar bels e buns raps. En sasez fugitivs economics, «Wirtschaftsflüchtlinge», dals «noss», quai na di naging gugent dad aut, ma è de facto tup-pamain uschia. Mamez cumprais.